





全 國 詞

劉榮平
編

廣
陵
書
社





全 國 詞

叁

編者：劉榮平
協編：連天雄
趙瑞華
吳可文 江 卉

廣陵書社

謝章鉞

謝章鉞（一八二〇—一九〇三），字枚如，福建長樂人。清道光二十九年（一八四九）中副車（副榜貢生），清同治四年（一八六五）中舉人，清光緒二年（一八七六）應禮部試，次年舉進士，授中書舍人，隨即掛冠歸講江西白鹿洞書院，後主講福州致用書院講席十三年。著述甚富，刊本有《賭棋山莊文集》七卷、《文集續編》二卷、《文集又續編》二卷、《賭棋山莊詩集》十四卷、《酒邊詞》八卷、《賭棋山莊餘集》八卷、《賭棋山莊詞話》十二卷、《詞話續編》五卷、《說文閩音通》二卷、《課餘偶錄》四卷、《課餘續錄》五卷、《圍爐瑣憶》一卷、《藤陰客贅》一卷、《稗販雜錄》四卷、《校刻東風謝氏詩略》四卷。另有若干稿本存世。謝氏在詩、詞、文、經學等方面均有建樹，尤以詞學批評得享盛名。譚獻評其學曰：「閩中學人，可以稱首」。（劉榮平《賭棋山莊詞話校注·前言》）

茲據清光緒十五年《賭棋山莊所著書》本《酒

邊詞》、清咸豐六年（一八五六）（一一二卷）清同治

二年刻本（四一六卷）謝章鉞等撰《聚紅樹雅集詞》

錄入，校以清光緒十年刻《賭棋山莊全集》本《賭棋

山莊詞話》、江蘇古籍出版社二〇〇〇年版陳慶元

編《賭棋山莊稿本》、福建圖書館藏鈔本何軒舉撰

《竹情齋詩話》。復據民國七年（一九一八）石印本

《賭棋山莊餘集》、《賭棋山莊詞稿》（收入《賭棋山

莊稿本》、稿本《賭棋山莊文集》（收入《賭棋山莊

稿本》、清宣統二年（一九一〇）鉛印本宋謙撰《燈

昏鏡曉詞》、《賭棋山莊詞話》、福建圖書館藏稿本

《賭棋山莊遺稿》補輯。陳昌強輯錄《賭棋山莊詞》

（收入吉林文史出版社二〇〇九年版陳慶元主編《謝

章鉞集》）對謝章鉞詞作了整理彙編，據參。

賀新涼

夜與黃肖巖宗彝談東漢人甚歡，時肖巖

將遊永安，行期已迫

僕本狂生耳。卻無端、長歌當哭，時愁時喜。二十

年來談節義，熱血一腔而已。況青眼、又逢吾子。

慷慨相期成底事，算英雄、總要輕生死。天下事，

擔當起。

男兒聲價甯朱紫。說甚麼、倚馬雄

詞，雕蟲小技。元禮林宗如可遇，定作千秋知己。

磨折慣、風波由爾。天地生才原有用，著精神、打

點留青史。方不愧、稱名士。

其二

此去君知否。算蒼天、一番仁愛，玉成吾子。愈鍊

才華真愈出，他日施為基此。願且把、離愁束起。

人世更番成泡幻，那古來、豪傑何曾死。心中事，

須料理。

凌波一棹風煙裏。撇不下、相知三

載，相思千里。亦曉經年原小別，怎奈余情難已。

況未發、欄衫利市。潘鬢絲絲看已近，問生平、歸

著如何矣。拔長劍，斫江水。

西施

懷劉芑川家謀，時在甯德

相逢酒市淚痕搓。慷慨發狂歌。秋風雙臂，長

劍幾摩挲。多事劉郎、苦作傷心語，熱血著人

多。如今無計相思睽，登高望、奈愁何。離雲

一角、慘綠鎖關河。引鶴齋頭、料想常高卧，怕有

夢經過。芑川寓齋名曰「引鶴」。

歸田樂 前題

執手長亭路。想當時、伴君西下，我把斜陽妒。歌

也痛哭也，醉也，愁也，黯黯雲山離離樹。如

飛轎子去。怎曉回頭魂銷處。輕波吹皺，風起花

如霧。行一送者七，計日四計程三百。八尺藤箋

斷腸句。

獻衷心 前題

接雙魚添出，血淚絲絲。珍重意，時念之。將

空山荷鋤，踏月采元芝。無露骨，勿見角，蘊清

奇。狂變恨，熱成癡。當風一葉受風欺。便

奇花綴綵，何補枯枝。從今後，描擁腫，付支離。清

勿露骨，奇無見角」，芑川書中語也。

憶王孫 前題

不合瑤琴終日抱。彈一曲、一番煩惱。幾回挂壁

更無聊，風過也、聲聲好。

劉郎遲汝蓬萊道。

借妙手、煙霞再造。伯輿終竟死於情，鋤不盡、王孫草。

賀新涼 寄李少棠敬

我本多情者。這一絲、回環不斷，眉頭心下。細雨黃昏人去後，最是難捱此夜。有無限、愁魔暗惹。勉強拋他又起，似金城、鑄就無些罅。心中事，從何寫。當時識字真非也。把古人、愁懷恨境，合同而化。甚事干卿卿自苦，痛飲讀騷聊且。作達語、大都是詐。三十年華風樣過，卻鈴鈴、獨抱千金價。怎教我，肝腸暇。

虞美人

一灣流水山如霧。迷卻相思路。池臺盡處草萋萋。人在寒蛩聲裏向風啼。孤燈照眼都成淚。還恐伊憔悴。錦衾繡枕不成情。獨倚危樓看月到天明。

賀新涼

閩縣李光瑚，字亦珊，仕廣州別駕。以家

難效於官，妻蔡氏殉之。其友仲振履為之填《雙

鴛詞》院本，甚悽惋，哀之而作

苦雨淒風夜。把這（《賭棋山莊詞話》卷二作此）卷、長吟一片（《賭棋山莊詞話》卷二作遍），數行泣下。夫婦人間多似蟻（《賭棋山莊詞話》卷二作鰥），似汝淒涼蓋寡。儘辛苦、艱難都罷。委曲求全還未得，況無端、貝錦工嘲罵。心中痛，誰能寫。肝腸寸斷顏凋謝。卻猶將、綱常二字，時時認者。為婦為兒無一可，此罪千秋難赦。說不出、淚痕盈把。博得旁觀稱苦節，想君心、聽此添悲咤。真不願，如斯也。

浣溪沙

一紙魚書遠道來。幾番讀罷又重開。書中微意要人猜。上說鶯花逢苦雨，下言池館長蒼苔。不提離別更堪哀。

醉春風

默向東風嫁。忍把南雲罵。人前都說不相思，詐。詐。詐。眼角遲留，心頭恍惚，意中牽挂。願

與鴛鴦化。長傍芙蓉罈。雙眉照鏡最分明，畫。畫。爾許年華，者般人影，那番情話。

羅敷媚

撩人心緒西風緊，愁也添時。病也添時。獨倚空牀懶起時。自家情緒自家綰，神也瞞伊。鬼也瞞伊。夢裏模糊道著伊。

酷相思

夜雨孤燈鳴促織。葉簌簌、空階積。問若此、幽芳誰愛惜。汝愁也、無人識。汝病也、無人識。卿似芳魂儂似魄。不必論形迹。算爲汝、情絲牽百尺。一語也、千金值。一笑也、千金值。

蘇幕遮

月如鉤，波似鏡。卮字欄邊，隱約雙身並。私語最妨人竊聽。未說今生，先把來生訂。想當初，思究竟。儂喚鸚哥，卿效鸚哥應。笑折花枝來作證。儂命如花，卿與花爲命。

八聲甘州

招諸同好飲西園，倚醉賦

忽聲聲暮角出江城，萬里下長風。請君抽寶劍，儂搗羯鼓，秋氣橫空。無那懷人拚酒，天際叫歸鴻。我欲從之去，南北西東。不盡悲歡恩怨，盡一情所結，千語難窮。嘆百年世事，只是夕陽紅。要爭些、男兒聲價，莫令人、吳下喚阿蒙。君聞否、三江五嶺，鐵騎倥偬。

賀新涼

讀少棠詞有感

無計將天補。便媧皇、重來鍊石，難禁風雨。門外愁雲深幾尺，匹馬佳人西去。算世上、曾無佳處。駭女癡男原是福，畧聰明、便覺無窮苦。還說甚，神仙侶。這身拚化長亭樹。更化爲、鷓鴣鴝，離魂叫住。十二瓊樓花似繡，攜手惟余與汝。恨明月、又來相妒。情話不妨雙影落，惹紛紛、下界停眸覷。他又起，浪猜語。

憶秦娥

寓齋見月

空庭雪。斷雲時漏斷腸月。斷腸月。南飛烏鵲，一聲淒絕。百年怎得哀歌歇。雙心怎曉愁

時節。愁時節。長途長夜，孤燈孤客。

其二

空房怯。枯腸欲共枯燈絕。枯燈絕。夢中恍恍，見伊鳴咽。寒風作響窗紗裂。寸心暗把愁絲結。愁絲結。百般珍重，當時曾說。

賀新涼 枕

眼角眉尖泥。漬熒熒、淚痕偏大，粉痕還細。擁被添香枯坐慣，拋向空牀空際。想當日、金釵墜髻。隱出紅腮花幾點，快連宵、聚首河山誓。留不住，真無計。百年好夢今宵繼。怎瞞他、相思耳熱，相憐目睇。交頸鴛鴦雙影重，輾轉中間先敝。看微笑、秋波欲閉。攬臂驚郎消瘦甚，緊香肩、不與橫肱替。長共此，便君惠。

水調歌頭 贈織女

矯首望天闕，數片晚風柔。不知織女，那樣情話對牽牛。便算一年一日，十二萬年之內，已得幾千秋。如此老夫婦，豈有別離愁。

雲黯黯，

山渺渺，水悠悠。可憐三百里外，少婦倚高樓。賤子如今卅歲，不解齊眉舉案，能穀古稀不。大笑看河鼓，歸去莫遲留。

滿江紅 寄葉與端滋森

杯酒相逢，算三載、生平知己。攜手道、多情如汝，人間有幾。我聽斯言真欲涕，一腔舊恨誰能理。請君坐、彈鋏為君歌，君其喜。南飛鵲，東流水。勞勞者，滔滔矣。問剎那世界，英雄誰是。罵世爭先摹阮籍，憐才不管輸陳起。向當年、屈賈說傷心，謊而已。

其二

珍重之情，尚不在、區區名士。祇今日、風聲鶴唳，那堪如是。千古功名爭衛霍，五言文字輸蘇李。棄繻生、當日有終軍，奇男子。釣龍處，高臺毀。樂遊曲，聲未已。看無諸宮闕，煙塵四起。天地生春時雨後，江山如夢斜陽裏。把酒杯、憑弔越王墳，危欄倚。

長亭怨 月

歷多少、盈虧時節。更向愁人，十分皎潔。幾度推窗，三更坐地、難拋撇。私情脈脈，暗欲向、吳剛說。光景未團圓，便玉斧、難修此缺。飄瞥。

有南飛歸鳥，孤影橫風明滅。關山一色，想其下、有人嗚咽。且長跪、細訴嫦娥，賜靈藥、同居瓊闕。他道是偷來，恐汝清高不屑。

憶秦娥

秦原作情 五鼓不寐，月光隱隱上窗隙。

起挑殘燈，潑墨填此

殘更盡。一盞明月懸新鏡。懸新鏡。無人梳洗，不如收鏡。離情一樣遙相證。怨山怨水傷春病。傷春病。溫存非我，誰知心性。

珍珠簾

七夕會飲，有懷芑川、肖巖

牽牛花發秋深處。數佳期、恰向銀河西去。歷劫到神仙，尚不忘兒女。此際嫦娥應有恨，恨難得、團圓如汝。何苦。又織起離愁，一天風雨。當日酒榼詩筒，倚瓜筵乞巧，幾番歌舞。含醉拜雙

星，結有情儔侶。犢鼻空懸人已往，莽關山、相思何許。河鼓。為寄語歸來，鵲橋留與。（以上《酒邊詞》卷一）

長亭怨

登金山塔院

算三度、鷗邊拚酒。一月垂天，萬山窺牖。看劍哀歌，當年此際、同吾友。而今往矣，空折得、離亭柳。柳已綠成陰，欲齊上、江樓能否。回首。

那馮夷起舞，睽睽雙眸如斗。腥臊海氣，莫染卻、蓬萊八九。問誰是、占住鼇頭，真辜負、屠龍妙手。何日快澄清，爛醉騎鯨西走。

虞美人

遲寄書人不至

離愁欲寫偏無字。況少傳書至。遙天黯淡上黃沙。獨自闌干斷續數歸鴉。想伊不忍將儂罵。耳熱孤燈夜。涼風陳陳更無情。吹出故鄉月色向人明。

滿江紅

答李星村應庚

無賴西風，把秋氣、吹人這樣。我欲向、天門一

訴，天高無量。醉後吟君金縷曲，填胸酒挾愁根上。憶騎龍、昨夜看蓬萊，狂風浪。淒涼地，

將花葬。蒼茫地，將雲放。作一番癡想，雄心又壯。狗尾甯爲隨俗計，虎頭空負封侯相。那灞陵、醉尉猛相訶，亦其當。

賀新涼

余來春有甯德之行，留別劉筠川永松

三載稱知己。算當年、墨莊筠川別業一席，相逢伊始。夏課論文陪驥尾，溷俗無聊而已。過八月、槐黃了矣。恰好九哥燕市至，令兄芑川。向西州、破屋投名紙。兄及弟，交遊起。乃攜石鼓山頭履。

著侵晨、臺江買棹，煙波十里。東冶黃生肖巖時在坐，形穢我方自恥。卻謂我、才華可喜。撩我生平心事熱，莽雄情、看劍秋風裏。知之者，程夫子。

程石夫玉英。

其二

以後離情起。屈英才、照盤苜蓿，興文邊鄙。芑川司訓甯德。我以前人相砥礪，謝鄭風流未已。吾鄉鄭六

亭兼才、謝退谷金鑾，俱以教諭樹績於時。亦謂我、雄心勿死。

有弟切磋還汝藉，算關情、第一今惟此。言未既，淚如水。而今此景又非矣。逼來春、我將北

去，雲山迤邐。況復沙溪人已遠，肖巖在沙縣。從此賞音誰是。最難舍、石林齋裏。與端。佳日春秋須

好句，壯詞壇、刁斗邀程李星村。珍重也，健男子。

筠川有「海濱健男子」章。

更漏子

雨疎疎，風索索。一片傷心樓閣。人影隻，燭花單。羅衣徹夜寒。斷蟲吟，孤雁語。添出許多酸楚。雲黯淡，樹模糊。家山認得無。

一葉落

飲連蟠閣

眼角覷。心頭訴。此時只望有風雨。遠山滑滑泥，卿卿怎能去。怎能去。又得幾天住。

生查子

垂柳倚雙橋，舊是郎來處。芳草忽無情，綠向雙橋去。不醉病懨懨，細想緣何故。小妹尚酣

嬉，亂把飛紅數。

滿江紅

旅宿白鶴嶺

強捉揚花，使化作、浮萍飄去。況生質、如斯薄弱，風波難據。匹馬騎雲山不斷，孤燈夢雨家何處。看濃陰、海濤帶長天，迷鄉樹。青青眼，將誰覷。錚錚骨，將伊妒。況茫茫塵土，銷魂已屢。萬古勞人甯有盡，老天離恨猶如許。喚王喬、控鶴共飛昇，瑤京住。

前調

忽發狂歌，被酒後、其聲欲裂。更隻眼、看天而笑，天方苦熱。人夜英雄君似鼠，當秋消瘦吾如蝶。問悠悠、千古為誰哀，哀豪傑。千金劍，摧為鐵。萬金駿，徒餘血。算身後浮名，生前塵劫。畢竟些須留亦好，不然半世空磨折。但如今、事業愧傳人，怎堪說。

霜天曉角

花朝

一簾春透。人近花朝瘦。十二畫闌西畔，風聲急、

吹紅豆。苦雨狂時候。隔窻燈火皺。獨坐

宵深無語，偷解下、金錢逗。

賀新涼

芭川書問近狀，並故鄉近事，填此代札

不見三年矣。便一年、幾封魚雁，添愁而已。訪戴南來君又去，如此緣慳何以。愧孤負、生平知己。打疊千般思細說，卻紛紛、心下從何起。孤燈夜，離愁裏。

昔君訂囑言凡幾。謂千金、之軀善保，勿為情死。別後滄桑經屢變，安得開懷而喜。擬幾度、移書報爾。天壤茫茫多恨事，算勞生、猶是尋常耳。欲提筆，書又止。

其二

昔日同遊子。便無聊、銷愁詩酒，平安差喜。第一黃生腸欲斷，兩鬢蕭疎餘幾。那老屋、三間屢徙。弟死家貧身又病，況雲山、無賴還千里。歸來後，仲秋起。

淒涼歲事殘冬裏。看黃昏、滿天風雪，何方乞米。苦調欲彈彈不出，翻盡宮商角徵。問究竟、移情誰是。我到傷心無可語，卻背人、搵

淚青衫底。想今日，又行矣。

其三

世事茫茫裏。發哀歌、唾壺擊碎，看天而起。畫角秋風吹落日，海水揚塵千里。那簫管、夜深有幾。官府催租聲不斷，誤幾家、紅粉飄零死。樂遊曲，猶佳耳。

近來令弟精詩理。忽傍山、鄂跏堂築，並招葉子。人謂吟臺光祿再，惜我無能及此。我偏想、臺江之李。一世才名差不惡，卻看山、看水傷知己。真可笑，無聊矣。星村時從余問芭川。『嘆平生可笑，無聊之至』，星村《滿江紅》句也。吾鄉光祿吟臺在省城光祿坊，先輩許有介紹詩社之處。

其四

未見飛鸞水。便傳聞、春風化雨，一門桃李。更道昂藏多健骨，不但能文而已。我想此、君心詎喜。十載買絲思補袞，卻無端、繡帨稱針黹。問始願，豈如是。
況君隔歲雙魚裏。曾有言、蒼茫獨立，同心者幾。竭力支撐纔一二，未盡區區便止。

君聽我、別陳一旨。不愧古人君已可，更文章、價重三都紙。如僕者，真堪恥。

御街行

膽瓶花片因風轉。絆幾縷、爐煙軟。滿庭竹葉傍窻飛，無數蟲鳴孤館。月痕如練，隔簾人道，天近清明暖。
無情瘦骨無心管。訴往事、春光晚。銷魂第一是青山，山遠人兒尤遠。銀燈屢撥，欲留孤影，作我宵深伴。

浪淘沙

暮雨又霏霏。歸鳥南飛。欄干拍徧半邊欹。瞥見落紅牆角颭，幾縷遊絲。
消瘦想容肌。不耐羅衣。羌無言語皺雙眉。流水一灣山一曲，有箇人兒。

前調 見月

未缺總成光。流照他鄉。一春花事要隄防。七寶闌邊都是暈，最怕風狂。
冷露滿霓裳。回首蒼茫。人兒只會射烏強。畢竟舊恩忘不得，奔

後無郎。

賀新涼

為芑川題張亨甫際亮《九曲泛月圖》

慷慨張平子。把哀歌、提醒一世，如今已矣。不得見君吾甚恨，得見諒稱知己。想寫此、無聊而已。平日多愁緣底事，卻蒼茫、託興思山水。更何論，畫神理。

劉郎愛汝真無比。抱山陽、千秋舊痛，淚痕未止。殘墨護持如拱璧，紙尾留題有幾。但九曲、近來何似。蟻賊紛紛為窟宅，聞采茶、聲斷虹橋裏。看長卷，傷心起。

卜算子

帶醉着歡衣，笑作男兒拜。一寸芳心不自由，都向秋波賣。卜妹太嬌憨，學說相思話。忽傍檀郎念妾詩，眞把人羞壞。

摸魚兒

貽故鄉諸同好

廿日來、銷魂難數，量愁應滿三斗。當時一笑吞明月，跣足科頭攜手。曾記否。是那處、旗亭帶醉狂歌走。而今難又。只孤館孤魂，孤燈孤客，

孤坐五更後。

停雲外，曲曲春山如繡。故人

應有話舊。酒邊偶爾離心起，未必雙眉不皺。重聚首。恐瘦骨、無多凝血皆紅豆。枯腸迴九。況杜宇聲中，一天風雨，吹盡舊花柳。

點絳脣

網起殘紅，蛸蠅也解憐香趣。心頭如霧。忘卻銷魂句。絕好春光，可惜成虛度。鶯啼處。愁絲千縷。恨不纏伊住。

虞美人

見紅梅有感

恰如國色春風裏。薄醉驕羅綺。遠山濃淡染雙眉。忽憶箇人梳洗此花宜。粧臺近日平安否。吹盡樓頭柳。戴花人更比花妍。最苦今宵燒燭對花眠。

南鄉子

夜風四號，有感於心

海氣撼邊城。海若驅風萬里行。似訴似吟還似答，分明。中有深閨惜別情。無柰不成更。無賴寒蟲唧唧聲。一縷離魂吹欲墜，心驚。瘦骨年

來分外輕。

采桑子

心頭輾轉渾無着，纔要畫眉。又欲熏衣。百樣思量總不宜。干卿甚事偏如許，花氣微微。日影遲遲。瘦到腰肢不自知。

蘇幕遮

月深深，人悄悄。窸窣梁間，饑鼠帶聲敲。獨夜偏長天未曉。恐照孤眠，故撥燈光小。末如何，終不了。來去心頭，百樣添煩惱。一片離聲風際裊。昨日金籠，纔養相思鳥。

百字令

清明

春光似箭，看鶯嬌蝶嬾、清明又到。梨樹陰陰聞故鬼，如訴如啼如禱。南國家山，杜鵑滴血，綠遍王孫草。滿城苦雨，柳條檐際飛掃。卻憶張

籍當時，酒邊戲語，百樣添煩惱。寒食西風吹點淚，此際纔為情好。一別六年，夜臺無雁，幽信何從討。孤遊已屢，箇人曾否知道。故友張君任如歿六年

矣。日余與君泛論及交際，君笑曰：「清明肯流幾點淚，方見好也。」越一年而君竟歿。三復斯言，能無腹痛耶？

摸魚兒

芭川歸自福甯，置飲，填此奉呈

問千秋、知音者幾，半生無過劉九。相逢一笑都如夢，不住傷心攜手。平視久。認窗外、梅花傲骨經霜有。枯燈漸斂。喜引鶴山齋，懷藤水榭，常共夜深酒。青缸劍，孤負長年塵垢。解衣拋付屠狗。裝魚挂壁惟其便，未必能留不朽。心想又。把光彩、銷沉何以關讒口。添衣短後。便鐵塞彎弓，金川捧檄，裹革僕能走。

其二

猛見君、挑燈一笑，目光四射如弩。低頭拍案呼而起，此際熱腸難數。將我覷。謂十載京華，衣上皆塵土。英雄無主。算伴食中書，焚香晝寢，安用力如虎。斯言出，一痛雄心俱沮。雖然我為君舞。乾坤莽莽知何意，豎子安能千古。君莫苦。且濁酒幾杯，休負今宵賭。江山如許。看

海市迷離，風花出沒，不樂亦何補。

惜花陰 送春

他鄉不識春何處。忍把春光數。春色已闌珊，春雨春風，滿地飛春絮。丁甯春趁家山去。為向春閨訴。春病那人兒，一寸春心，都被春愁據。

消息 題芭川小照，作挂劍欲拔狀

獨立秋風，雙眸如電，蕭疎華髮。七尺安歸，千金自買，萬感心頭發。拔難見穎，藏還苦蝕，真把尊拳惱煞。無如何、張華去矣，光采幾人能說。君方惆悵，我更蒼茫，第一情根難割。半世狂歌，幾番醉舞，斫地皆成血。無多瘦骨，無端熱淚，拚與風塵摧折。怎忍道、健兒意氣，殺人寸鐵。

摸魚兒 望月

莽關山、蒼茫一髮，清光無賴如許。長生閱盡盈虧恨，便做嫦娥何補。君算否。自過了今宵，幾日還三五。吳剛最苦。伴妖兔無靈，癡蟾不偶，

寂寞共千古。眞何意，更把桂花鑄住。秋香

不到下土。搔頭醉後鄉心緊，數徧瓊樓玉宇。將伊訴。那碧海青天，伊且愁無侶。乘風歸去。看淺淺一灣，箇儂恍佛，露出舊眉嫵。

金縷曲 寄少棠

記否蒹葭閣。向酒邊、行期未問，歸期先約。又道年來蒙汝愛，但汝愛余眞錯。竟聽汝、他鄉飄泊。宇宙雖寬知己少，算從今、規勸誰能著。況心病，原難藥。離亭柳絮風蕭索。恨無端、送人北去，雲山太惡。當日相知嫌不密，今日相思方覺。汝珍重、腰肢瘦削。晏起早眠加餐飯，那傷心、文字休多作。言不盡，淚先落。

其二

此意濃於酒。眞令人、無窮悲感，心頭欲嘔。我比杜鵑聲裏坐，一世閒愁不了。痛三歲、麻衣著後。地下飄零慈母線，算外家、愛我如君少。那知己，同吾友。謂芭川。雄才今日何人有。嘆園

棋、東南劫急，悲涼國手。彈指滄桑還似此，何況
饑驅奔走。只百樣、期君知否。未得君書時盼望，
得一書、夢寐添煩擾。君與我，誰不朽。

蝶戀花

題寄內書後

誰解忘情如太上。把汝心頭，日夕長供養。消瘦
雙身應一樣。羅衾摸偏（應為偏）天難亮。來日
姻緣今日長。汝看離人，夫婦多無恙。留得有餘
眞穩當。果然愛我休惆悵。

行香子

亂響風聲。亂叫蟲聲。更雨聲、時重時輕。寒陰
一尺，瘦影三更。天黯黯，人悄悄，夜清清。
將寐偏驚。欲坐還行。寸心兒、無自分明。誰堪
說恨，未解忘情。夢昏昏，身怯怯，淚盈盈。

摸魚兒

莽乾坤、愁雲萬里，悲涼甯獨一我。紛紛閣上淩
煙畫，三十不侯爭可。低首坐。把天壤、許多恨
事看人做。想來未妥。便幾字文章，自誇李杜，

都是拾餘唾。今而後，心病休相摧挫。頭巾
聊且撕破。功名二字尋常耳，十載驚心烽火。慙
飯顆。算無策、救時只合長窮餓。惜哉此座。問
如許昂藏，欲居何等，吾笑秀才懦。

水調歌頭

東湖泛月

百歲及時樂，君莫苦遲留。狂歌把酒，聊且散髮
弄扁舟。只恨嫦娥無賴，帶些雲情雨意，孤負我
雙眸。使我感圓缺，萬事上心頭。棄短棹，
揮長劍，斫東流。東流何限，渺渺總是古今愁。
知否後人笑汝，如此江山寂寞，橫海不封侯。挂
席狎波浪，努力共千秋。

浣溪紗

便是虛文亦感恩。相思何況有啼痕。教人慰藉
反無言。幾字之中千宛轉，數行以外半寒暄。
想伊多說恐銷魂。

水調歌頭

招諸同志飲，賦呈

四坐勿諠笑，聽我酒邊謳。文章富貴功業，無一

可長留。幸有杯中之物，尚是生平實得，爛醉復何求。為問酣嬉意，能索解人不。

或仰屋，

或投閣，或登樓。無窮苦趣，轉瞬白盡世間頭。只合逢場作戲，一任千秋以後，呼馬與呼牛。大笑揖君飲，君莫覓封侯。

滿江紅

鍊石螭皇，漏一角、情天未補。看我輩、肝腸畧可，幾絲分與。煙雨飄零哀燕雀，風雲變化思龍虎。莫悠悠、貽累到文章，如塵土。

銅為行，

希鄒魯。椽為筆，追燕許。但未知何術，果能千古。敢道迂疎堪濟世，不妨豁達為豪語。對長風、把酒拍紅牙，狂飛舞。
（以上《酒邊詞》卷二）

酷相思

八尺輕舟桃葉渡。載不起、離愁去。只怕向、碧闌干外覷。蝶兒也、雙雙住。燕兒也、雙雙住。便是尊前同笑語。總覺無情緒。看一片、飛紅啼杜宇。酒醉也、瀟瀟雨。酒醒也、瀟瀟雨。

滿江紅

塊壘都消，把萬事、付之長歎。算便有、古稀年壽，將踰一半。已苦巢危能墜燕，那堪家遠還聞雁。且登樓、作賦以銷憂，如王粲。時自喜，弄文翰。時自愛，加餐飯。將雙雙冷眼，世間偷覷。只為名心除未盡，更兼醉態來為患。溯知交、相易果如何，能無汗。

大江東去

樽前慷慨，卻一番自喜、一番自苦。天下英雄君與操，碌碌其餘誰數。究竟曹劉，至今安在，寂寞皆塵土。疎狂如我，恃何能有千古。只是早歲攻書，睥睨一切，頗覺人如虎。文苑儒林吾豈敢，搖筆頻驚風雨。溷跡鶯花，寄愁詩酒，此意將誰語。我無足惜，近來時事如許。

酷相思

見蘭有憶

自種幽蘭經二載。常獨倚、奩邊待。便薄怒、相看顏亦改。晨粧也、教人采。晚粧也、教人采。客

裏依然春似海。偏覺無光彩。想戴上、雲鬟香幾倍。對花也、伊如在。背花也、伊如在。

青玉案 和芑川

興酣落筆驚風雨。時自謂、能千古。莫逆於心同起舞。忽然晁董，忽然衛霍，又忽然燕許。酒邊拔劍雙眸努。不信紛紛成畫虎。天看斯人天亦苦。半為情話，半為快論，又半為蠻語。

念奴嬌

題東洋學山閣壁

愁塵萬斛，看沉埋一帶、江山如許。太白騎鯨歸采石，知道此間難住。大是無聊，藥爐丹竈，苦把神仙數。霍君應笑，神仙究竟奚據。

見說問

月亭邊，宵深有鬼，猶唱秋墳句。鬼也於今零落盡，剩得淒風疾雨。我本羈人，只宜酣醉，否則歸家去。長年作客，獨行獨坐何趣。問月亭，崔刺史世石

別業，相傳刺史歿後，猶能召梨園謠客，詳芑川《鶴場漫志》。

滿庭芳

步韻答芑川

二十餘年，談經擊劍，蒼茫何事人間。風流江左，

家法愧東山。獨自乾坤起舞，可憐歲月投閒。英雄事，千秋有幾，懷抱孰能寬。才難。可笑吾，

擔世患，世罵吾頑。幸生平、知己猶未全慳。敝帚千金自享，芳蘭一握齊看。扶衰手，非君誰屬，賤子力虛屠。

蘇幕遮

月斜時，人定後。無數離情，暗向心頭逗。爭奈銷魂花又湊。柳似伊柔，梅似伊消瘦。枕痕明，燈暈透。夢到伊行，正是眠時候。顰着雲鬢釵欲溜。手撥薰籠，幾度眉峰皺。

滿江紅

久雨，欲遊龍湫不得，視芑川

雨雨風風，二十日、淋窗飄瓦。卻累我、低頭矮屋，有詩難寫。千里騎鯨天半去，拏雲挽出羲和駕。照短筇、秀色上吟肩，龍湫下。世間語，

常驚訝。心頭願，還悲詫。擬糟邱放浪，連朝達夜。萬事無妨時輩笑，一生最苦山靈罵。問天台、既人又歸來，何為者。